

Monchmol kimmts halt onnerst

Vor acht Daach habb ich in de Kapellestrooß de Schorsch getroffen. Irchendwie hotter merr garnit gefalle, weiler so e komisch Gesicht gemacht hott. Ei Schorsch, habb ich gefroocht, du guckst so dumm aus de Wäsch, was issen los?

Ach nix, gibt de Schorsch zur Antwort, awwer mette Wäsch bisde noh droo.

Ich war gonz erstaunt: Hosde dich mettem Kättche iwwer die Wäsch gestritte?

De Schorsch hott genickt: Nit grad iwwer die Wäsch, awwer so ähnlich. Nix mehr kann ich alloons mache. Zieh ich e frisch Hemd oo, sacht se: Dess Hemd – dess basst doch iwwerhaupt nit zu deiner Hos. Unn was hosden ferr Strimp oo? Die Schuh doo ziehdsde merr aus, die Absatz sinn doch gonz schepp, ei siehdsde dess dann nit? Unn so geht's alls weider, als ob merr enn kloone Bub wär.

Ich habb genickt: E Fraa moont halt immer, wenn de Monn was Falsches oo hot, wär sie die Blomierte unn nit de Monn. Weils heeßt: Guck emol, so lässt die den uff de Strooß erumlaafe! Also heer uff doi Fraa, dann hosde doi Ruh unn konnst iwwerall hiegeh.

Nit iwwerall, sacht de Schorsch, dess kimmt joo noch dezu. Glaab merr, ich det alsemol gern alloo in e Wertschaft geh, nor mol ooner drinke, awwer aach dort isse alls debei, will iwwerall mett hie, unn dann dudse merr vor alle Leit die Hoorn von de Jack zoppele unn mir mettem Dascheduch die Mundecke abwische, grad als ob ich enn alde Dattergreis wär. Wenn ich nor wissd was ich doo mache kennt.

No ja, saach ich, ferr alloons in die Wertschaft ze geh gibt's enn Trick, unn ich versprech derr, wennde dess richdich mächst iss die oomol mettgonge unn dann nie mehr.

De Schorsch war gonz neugierisch: Ei was issen dess fern Trick?

Kumm her, habb ich zum Schorsch gesacht unn habbem was ins Ohr geflistert.

De Schorsch hott gut zugeheert, hott merr dann uff die Schulter gekloppt unn gelacht: Dess mach ich - unn doonoch kann ich garantiert monchmol alloons ooner drinke geh.

Om letzde Sunndaach beim Friehschoppe sacht de Schorsch zu mir: Dess mett de Wertschaft war widder emol so enn richdich bleede Honnes-Tipp, weil erauskumme iss was gonz onnerst.

Josses naa, habb ich mich verschrocke, ei was dann?

De Schorsch druff: Ich habbs so gemacht wie du gesacht host. Mir sinn mettem Fahrrad nooch Edderschem gefahrn, sinn dort inne Wertschaft gonge unn als dess ersde Bier uff de Disch kumme iss habb ich schunn gemeckert: Dess Glas nemme Se gleich widder mett unn makes erst emol voll, noochher wolle Se dess joo aach voll bezahlt hawwe. Beim Esse habb ich de Ober gerufe: Heernse mol, dess soll enn Seniorendeller soi? Mett so emm Schnitzel hott moin Opa soi Schuh besohlt, brenge Se merr gleich e onners. Unn alses ons Bezahle gonge iss, habb ich vor alle Leit verlengt, dass ich 20 Prozent Rabatt hawwe will. Doo iss de Werrt kumme unn hott gesacht, so Leit wie uns hätter grad gern. Als merr dann on unserne Fahrräder warn hotts Kättche ...

Juhu, habb ich gerufe, ... hotts Kättche geflennt unn gejammert: Du host mich vor alle Leit blomiert, dess konnsde mett mir nit mache, dess nächste Mol gehsde doo alloo hie – so wars doch, odder?

De Schorsch war gonz traurich: Dess moonst aach nor du. Als merr on de Fahrräder warn hotts Kättche merr enn dicke Kuss gewwe, hott mich gedrickt unn hott gejubelt: Schatz, endlich hosde dich emol dorchgesetzt, dess hott merr gefalle - unn weil uns de Werrt gern hott fahrn merr nächst Woch widder hierhie, gelle? Eiern Honnes